

道元卷之一百七十六


<p> 册曰：和明降中，万物化被。弥罗上下，音含灵烟。浮黎动休，景光攸往。中有权明，态佚瑶畅。泛景万合，俱真合明。夷阿从导，流布自生。九开七变，还戟异声。皇中之皇，好升生明。形历玄都，摄盟皈容。既宛光运，飞辉易隆。拂尘化光，邈妙太涤。光景扬威，入於无极。清节攸夷，德於至教。化元太皇，广运迁教。夷明主者，广玄翊教。太玄元帅，乘微归妙。右元和册，乃真武真君嗣教也。昔化元太皇帝君，治广运迁教元和宫。解曰：命明夷法主广玄翊大教君，监度太玄元帅曰：昔赤明丈人教戒曰：玄黄正炁，赤明初劫开图，历今凡五千余年，而乘教坚师，普度上下八荒内外者。吾始以汝嗣吾之教，兴而降，降而兴，莫不从炁之清浊，而於清浊之中可领上下。故闻教者善良进，鬼妖灭魔王伏。又可以登高临深，居处山泽自通，子宜秘之。开天航御历执符佑圣从吾所治四正太君 三元主者天运侍臣天灵降芒天喜从化 天睿分治子丑寅卯辰巳未申酉戌亥 右延康符，乃太皇高真总领元始积劫极运玉文，山川自进。吞佩告服，镇锁魔王，灭鬼诛妖，破邪立正。四府之符，先以此为首，余大事用之。深妙玄微，此不细具，自详自进，方可见矣。高上玉皇神祖道炁，飞华洞虚真灵，是生泛清圆天，凝滓方地，阴阳数极，肇启三明，回度天常，静镇川岳，根该品汇，威斥邪源。荡荡神功，难可胜载。此高上灵宝虚皇隐玄也。高上玉皇之炁，为万真祖领也。积一生三，三合成九，九炁列正，品物流形，巧妙功深，难可云喻。唯存形审生，穷数达变者，可要其妙。合神屏好恶累，绝尘静观，万感俱息，一毫不彰，泰定冥冥，光明四达。明者为神，见者曰性。神明同虚，性彻同幽。二者合化，结精杳冥，召摄三光，更炼真一。神功力久，德合祖神。刊简玉书，飞行太霄。虚能善应曰性，无方妙物曰神。性洞神明，合形结空。游是者，精炁杳冥，德合神祖，结精合神，则死生莫变。利生济物者，真业日隆。苟知领祖，则太玄不能自贵。纵情肆欲，流泛迷津者，虽道与之俱，而化源日远矣。调节炁情，通达三宫，采日华以平旦，服月华以夜半，暮则存斗映照

明堂，三景停晖，度契天运。然可必形书符，引炁已疾，立功化道，消殄魔精，佩受太极，以威六天。天性至静，缘炁变情，调炁则情释性平，性平则其道邻也。天谷绛宇，下望玄室，云罗真炁，内外洞明，合契天度，方可行神布炁，利物翼功也。其采日月华法，秘在玉佩、金铛、青腰众经。暮卧存斗，载于方诸洞玄洲石刻之文。二者自非调节炁情，通达三宫者，未可易行其道。不悟领祖，所以授之合神，未造神妙，所以授之揖晖，弃本逐末，取则因人。日月玄斗，旋斡化枢。飞英秀空，合成灵符。安镇天地，役召鬼神。灭落万精，摄御龙虎。学道相授，初不滥传。应运太平，灵文漏秘。得之者密，精勤而行之。日圆景方精，月圆精方景，中建五斗，合明三光。日诀在离，月诀在坤。戌起至辰，是谓五斗。三诀遍捻，召降灵芒。运辰於子，笔聚明辉也。日月魁魁，生化之源也。能降灵辉，何所不度。师曰：书符之初，南向，炷香，遍捻，三诀，各引灵辉灿烂一室，及砂纸等，悉令遍覆。乃以大指运天诀於子位，次笔其符日圆景方精，则先画一○内方以左转九回，念日魂十六字。则日精可致也。月方景圆精，次迭方内圆○，右转十回，念月魄二十四字，则月神可召也。精神混合，玄斗建中，於日月方之右点魁至魁，念七字，则□□□□□□□也。一字一点，以次至魁星向上拂笔。三光成焉。有云日念唵嚩□啰，月念唵嚩明啰，天呈星三头六臂，念唵天帝释章者，乃不是，三藏之梵音祝言，非道典所载也。若谓验於人，则何较道释之语。以玄科所禁，祖典所无。昧者罔知，紊乱教风。且法为有度之则也，岂可与众同论之。故当去彼取此，而各全教纲。允中谨按：上清紫文。吞日炁法，一名《赤丹金精石景水母玉胞经》。其法常以日初出时，东向，叩齿九通，毕，微咒日魂名，日中五帝字，曰：日魂朱景，照韬绿映。回霞赤童，玄炎飙象。呼此十六字毕，瞑目握固，存日中五色流霞来接一身，於是日光流霞俱入口中。又《上清紫书》有吞月精之法。月初出时，西向，叩齿十通，微咒月魄名，月中夫人字，曰：月魄暖萧，芳艳翳寥。婉虚灵兰，郁华结翹。淳金清莹，灵容素标。呼此二十四字毕，瞑目握固，存月中五色精光俱入口中。又月光中有黄炁大如目瞳，名曰飞黄，月五胞之精也。能修此道，则

奔日月之仙也。 圆景方精左九转念日君讳方景圆精右十转念月君讳□
□□□□□□拂出向上去 玄洞六虚，浸润万有。玄元太一之精也。平
旦汲之，贮以净器，转四维诀，投三光符入内，密祝曰： 太一玄泉，
天地灵津。五英交华，三明停辉。静炼百关，脏腑开明。威涤万邪，正
炁黄宁。急急如律令。 咒，求者给之。先取日华，次取月华，次想斗
光，铅筒作三光符投祝水内，常安静处，有求者给之。 师曰：若蛟蜃
鱼龙，水怪沙鬼等，当遏生津，以梓木筒作符，背用太极印，渍其所在
也。若木精魑魅，浮游野道，小妖故炁，鬼症飞尸者，当以竹膜作符，
祝书遣之。或用轻纸书，亦可。其符大镇天地，八威万精。但恐得之者
非其真材，行之者纯自不备也。朱砂笔砚，印篆符文，应法备用之具，
常须护静，勿混尘浊。盛则灵气应，浊则邪炁臻。旦夕清香，内外若一
，丹名潜运，我道日隆。法中所用之物俱洁盛，二字出《真语》中，盛
字作净字读。则灵炁易致，不必存笔为戈锋而后邪也。使内外若一，触
味清虚，虽未升真，而霄阶可冀也。 太极神篆虚皇灵符也。可以致真
召炁，禳辟万凶。癸亥终期，刻以金玉阳精平篆，盛以青囊。凡用，捻
上帝诀，引罡炁覆之，祝云： 太极分元，肇生九空。虚皇御历，招神
摄风。妖症荡灭，德契元宗。急急如上帝律令。 右癸亥日内交甲子之
癸亥时，以神枣木二寸五分，代其金玉印式。 斥检万魔，六品一法
，传教海内，赞化阐幽。鞠听冥情，摄邪皈道。 青真曰：考召，有六
丁六甲八吏召鬼神之神文，是也。今鞠听冥情，召治幽昧者，於考召为六
品之末，非斥检万魔之大宗也。有以考为拷，以召为照，以考邪为考鬼
之归也。归乎真宅，又焉能考照之。若则洞达幽冥，知鬼神之情状，考
何其漏也。学者於秋分，北向，启词誓盟洗心，不复再犯。告达玄灵，
请条四直，阴相生途，用资真业。当考召之时，手捻总目子诀，咒曰：
太阴化生，水位之精。虚危上应，龟蛇合形。周行，威摄万灵。无幽不
察，无愿不成。劫终劫始，剪伐魔精，救护群品，家国咸宁。敢有小鬼
，欲来现形。吾目一视，五岳摧倾。急急如律令。取罡气覆身，随施用
。 诀曰：坤为考，子为缚，兑为枷，中指中节为控，离为锁，辰为捉
，卯为现形，右手离文为遣用。此八诀，引罡炁，用召直符，乃四直。

能使幽魂即物现形，因人致词，保厄安危，济生度死。凡行元和考召，当於秋分日，北向悔过，然后关启玄灵，请降年月日时四直真史，辅道阐幽。用此八诀也，不用祝诀，自然合符。勿谓简略，取诸繁语，妄若冥昧，虑快俗情，以违太上敷布道真济生度死之意。夏月数视四方，若云炁勃郁，内有青黄黑赤之色，则运炁逆戾，水精乘以兴妖，时降冰雹恶风损物之兆也。当启虚皇上帝，捻左手午位，引荧星三芒下注绛宇，焕若赫日。次闭炁，以丹笔点左手大指根节。点讫，以大指转四维，引罡炁，捻四指上节过亥，复以大指运於辰。乃闭息禹步。祝曰：虚皇上帝，回运三辰。荧晶欵启，驱荡妖氛。明宫正炁，履邪匿形。荡荡元化，天地咸宁。祝毕，通息，引天罡炁向云吐之。存炁激芒，披廓云雾，则运炁应平，水精堕地。云炁者，青黄，主狂雹，黑赤，主恶风。夏月数视之，见当镇禳如前法也。运上节於辰，则以大指自四指上节直画过，自亥画辰，引罡炁，捻闭炁禹步也。师曰：若夏至日色云现於四方，不可禁咒，乃高真出游，所以乘三素也。其验风雹，视黑云中见青黄炁，光映蜿蜒，若盘屈。是夜或月光应云，亦有五色，宜详审之。赤妖腾炽，火炁作殃，焚荡丘林及人所止者，当启闻玄真，丹笔阳目，旺炁自覆，引罡炁临子，运子至离於四指甲下，闭炁叩齿禹步，南面引辰星五炁叹水，云：太白子摄火殃。乃吐辰星芒，遍覆丙丁之地。则火殃伏形，炎炽匿影。阳目，应谓左手大指上节，阳监目也。旺炁覆之，则四季所旺也。或取日时旺炁覆身，为镇禳宗领。引罡临子，亦是先转四维，用罡诀取炁，然后运入。所用之诀，四维之法，前云捻午位，引荧星芒，今引辰星者，谓捻子诀时，先引之，然后运诀过离，并四指甲下，叩齿禹步，望火嚬水也。念咒讫，乃吐辰星之光，犹黑云覆於丙丁之地，则火殃应散。火殃非火德之精，法可灭禁也。俗人误闻郑有祝禳之祝，则火德降灾，郑禳回禄，若洗涤侈心，今人反咎火德。土运过，以青缙作三光符镇戊。金运过，以赤缙作符镇庚。水运过，以黄缙作符镇壬。木运过，以白缙作符镇甲。火运过，以皂缙作符镇丙。乙丁己辛癸，以随方色缙作符，镇中央。则四炁合融，民物阜康。甲内戊庚壬临申子辰寅午戌，则为五运太过。乙丁己辛癸临亥卯未巳酉丑，

则为五运不及。若天符岁会，运炁相比者，不在镇禳之限。作符，取大寒初炁，启上真，召天医功曹，投于一境之地，则年谷屡丰矣。水逢四土，启岁元木德於卯日。木逢巳酉，启火元荧惑於午月午日。火逢申子，启土元镇星於未月未日。土逢亥卯，启金元太白於申月申日。金逢寅午，启水元辰星於子月子日。以方色币作三光符镇之，虽厄会元辰，灾疠不作。水逢四土者，谓水命之人，炁运推迁，逢辰戌丑未，或以纳音水衰，为旺色所克，则於是卯年卯月卯日，启岁元木德，以青色币作三光符佩之。若水旺土旺，则不必禳也。余皆以五行推究，各启其星。兼用六炁运仪，祈五常之精，以禳厄会，佩服三光者，尤佳。治肾病，则捻未诀，引岁星九芒覆脾。治肝病，则捻酉诀，引荧惑星三芒覆肺。治心病，则捻子诀，引镇星十二芒覆肾。治脾病，则捻卯诀，引太白星七芒覆肝。治肺病，则捻午诀，引辰星五芒覆心，付三光。水未为土鬼，故肾受病者捻未诀，引岁星九芒覆脾，闭息亦九通，如木九火三金七水五土十二息，星芒亦随其数。假令捻未诀，当转四维，先捻卯文，引岁星芒，然后捻未，存覆脾也。此祝由己疾，非全正炁者曷能之。传元和册者，五辛葷血，揖景味玄，散思贞明，栖神淡域，然后赉云锦之文，誓盟三官，平等运心，利己济物，功充道备，随业进阶。倘违禁科以身谢。冥考良由自作，勿咎道师。既闻三官，须择奇人。得其人则道不虚行，教纲流远。非其材，则神不启运，冥责日深。



[下载本文pdf文件](/pdf/3985-道元卷之一百七十六.pdf)